

萃升書院講義

宦官亡漢按語

按宦官之禍。中國一統之朝爲重。秦亡于趙高。唐亡于田令孜等。宋亡于童貫譚稹。明亡于魏忠賢等。而後漢自鄭衆誅竇憲。孫程等誅閹顯後。大柄遂落宦官之手。凡擁立藩支。輔翊母后。皆惟宦官是與。朱穆諸人。歸咎于和熹臨朝。不接公卿。以閹人通命兩宮。爲宦官强盛之始。實則光武不能辭責。是篇朱穆所言中常侍建武以後。悉用宦者。是也。魏晉至南北朝。宦寺之害。遜于漢唐。蓋由袁紹誅宦官後。凡諸奄人職掌。悉代以議郎郎中。既無豫政權之職掌。而中書監令。舍人。侍中。散騎常侍等。皆恒直禁掖。出入左右。又不藉通命于宮省。故晉與元魏。亦間有干柄之宦官。然其勢終不盛。元魏宦官出任州郡。其制又與歷代不同。後漢則禁掖無一士人。故和帝之誅竇憲。舍鄭衆外。無可與謀。范書宦者傳序。特宣明之。加以臨朝諸后。全倚宦官。順桓靈三帝之立。宦官或爲元功。或與定策。而漢事遂不可救。續漢百官志。中常侍千石。本注曰。宦者無員。無員額。後增秩比二千石。常

侍左右。從入內宮。贊導內衆事。顧問應對給事。小黃門六百石。本注曰。宦者無員。掌侍左右。受尚書事。上在內宮。關通中外。及中宮已下衆事。諸公主及王太妃等有疾苦。則使問之。黃門令一人。六百石。本注曰。主省中諸宦者。丞。從丞。各一人。本注曰。宦者。從丞。主出入從。黃門署長。畫室署長。玉堂署長。各一人。丙署長。七人。皆四百石。本注曰。宦者。各主中宮別處。中黃門百石。本注曰。宦者無員。（無額）後增比三百石。掌給事禁中。掖庭令一人。六百石。本注曰。宦者。掌後宮貴人采女事。左右丞。暴室丞各一人。本注曰。宦者。暴室丞。主中婦人疾病者。就此室治。其皇后貴人有罪。亦就此室。永巷令一人。六百石。本注曰。宦者。典宮婢侍使。丞一人。本注曰。宦者。御府令一人。六百石。本注曰。宦者。丞。織室丞。各一人。本注曰。宦者。祠祀令一人。六百石。丞一人。本注曰。宦者。鉤盾令一人。六百石。（典諸近池苑園游觀之處。）丞。永安丞。各一人。三百石。（永安北宮東北別小宮名。有觀園。）右屬少府。章和以下。中官稍廣。加營藥大官。御者。鉤盾尚方。考工別作監。皆六百石。宦者

爲之轉爲兼副或省。大長秋一人。二千石。本注曰。承秦將行宦者。景帝更名大長秋。或用士人。中興常用宦者。掌奉宣中宮命。凡給賜宗親及宗親當謁見者。關通之中宮出。則從丞一人。六百石。本注曰。宦者。中宮僕一人。千石。本注曰。宦者。主馭中宮。謁者令一人。六百石。中宮謁者三人。四百石。本注曰。宦者。主報中章。中宮尙書五人。六百石。本注曰。宦者。主中文書。中宮私府令一人。主中藏幣帛諸物。六百石。本注曰。宦者。中宮永巷令一人。六百石。丞一人。本注曰。宦者。中宮黃門冗從僕射一人。六百石。本注曰。宦者。主中黃門冗從。劉注。丁孚。漢儀曰。給事中宮侍郎六人。比尙書郎。宦者爲之。中宮署令一人。六百石。丞。復道（中閣道）丞。各一人。本注曰。宦者。中宮藥長一人。四百石。本注曰。宦者。右屬大長秋。本注曰。承秦有詹事一人。位在長秋上。亦宦者。成帝省之。以其職并長秋。是後皇后法駕出。則中謁者宦者。權兼詹事。奉引訖罷。宦者誅後。尙書選兼職吏一人。奉引云。其中長信宮長樂宮署少府。職如長秋。及餘吏。皆以宮名爲號。（長樂）五官史朱瑀之類。本注曰。

帝祖母稱長信宮。故有長信少府。長樂少府。位在長秋上。及秩吏皆宦者。秩次如中宮。長樂又有衛尉。僕爲太僕。皆二千石。在少府上。（丁孚漢儀曰丞六百石）其崩則省。不常置。又光祿勳下。本注曰。舊有左右曹。秩以二千石。上殿中。主受尙書奏事。平省之。世祖省。使小黃門郎受事。靈帝紀。熹平四年十月。改平準爲中準。使宦者爲令。列于內署。自是諸署悉以閹人爲丞令。按平準署。本隸大司農。平準署令。無悉用宦者文。向用士人。前書百官公卿表。中常侍左右曹皆加官。（所加或列侯至郎中）許嘉班伯皆以士人而爲中常侍。是中常侍專用宦者。始于光武。西京舊制。以左右曹受尙書奏事。光武省之。而以小黃門受尙書事。是爲宦官干政之始。大長秋。西京或用士人。而東京則專用宦者。長樂太僕之類。西京用士人。而東京亦多用宦者。蔡倫。州苞。曹騰。曹節。侯覽。皆爲長樂太僕。是也。單超。曹節。趙忠。皆拜車騎將軍。則位次三公。曹節領尙書令。則總機務。詳覈諸史。凡歷代定有宦官官制者。往往有宦官之禍。職權愈重。則禍愈大。西京宦者。本任中書令。故有

弘恭石顯之禍。成帝革之。其權勢遂殺。光武不任三公。而以侍從左右。受尚書事。屬之宦者。其後臨朝六后。皆任宦官。權勢竟至莫之與京。作俑之責。宜歸光武。西京宦者封侯。首張釋。文帝既立。即除其封。東京則自和帝以後。代有列侯之封。順帝並許以養子襲爵。曹操本襲曹騰之費亭侯。遂代漢而有中夏。熊氏錢氏後漢書補表皆列之。其如唐明之不知懲艾何。趙宋雖有貫穎之禍。而高宗定制。力抑宦寺。故南渡後。宦寺之勢遂殺。魏晉鑒于後漢。凡侍從左右。出內王言。皆代以侍中諸職。故宦官之勢亦輕。唐之內侍監。明之司禮監。開國之初。所定職掌已重。洎乎中葉。唐則以中尉中護軍。主京師兵權。監軍分方鎮兵權。知樞密分宰相之政權。又置諸使名額。凡京中要職。多有分釐。翰林學士院。亦有宦者爲使。明則京師有提督東西廠。或京營城守。各省各邊。皆有鎮守中官。而司禮掌印。權勢與首輔相埒。兩代崇重宦官。尚過于後漢。則其覆亡。固所謂求仁得仁。又何怨焉。陳寶之誅宦官不克。鉤黨之獄。李膺等名流死徙無算。明楊漣諸人。僅以文字劾魏璫。

而東林之死徙者亦無算。唐甘露之兵。自王涯十七族外。不及其他。當以其時與謀者少。特漢史褒陳寶。而唐史貶訓注。豈歐宋諸人。有所未察歟。唐王伾王叔文之獄。即欲收宦官兵權。昌黎誌柳州。竟不一爲伸辨。則知唐宦官之勢。又重于漢也。獻帝紀。中平元年九月。即位。初。令侍中給事黃門侍郎員各六人。賜公卿以下至黃門侍郎家一人爲郎。以補宦官諸署。侍于殿上。注引獻帝起居注曰。王允奏侍中黃門不得出入。不通賓客。自此始也。按自魏晉至南北朝。皆循此制。而蜀漢仍用宦官。遂亡于黃皓。此外如十六國之劉漢。五季之唐莊宗。十國之南漢。皆亡于此。即晉賈后之禍。亦有宦者參與其間。嗚呼烈矣。清趙氏翼廿二史劄記。東漢及唐明宦官之禍最烈。然亦有不同。唐明闈寺。先害國而後及于民。漢則先害民而後及于國。周舉疏言。豎宦之人。亦復虛以形勢。威侮良家。取女閉之。至于白首而無配偶。（原書作左雄疏誤。）此周舉傳。黃瓊疏言。宦豎盈朝。重封累爵。明珠南金之寶。充滿其室。（黃瓊傳。）侯覽傳。前後奪人宅三百八十一所。田一百一

十八頃。起立第宅十六區。皆有高樓池苑。僭類宮省。預作壽塚。石椁雙闕。高廡百尺。破人居室。發掘墳墓。虜奪良人。妻略婦子。董卓弑弘農王。獻帝葬之于趙忠成壙中。（忠已被誅。）及獻帝自長安歸洛陽。宮室已盡焚。乃駐于忠故宅。（獻帝紀。）迨後韓馥以冀州刺史讓袁紹。出居于鄴中之忠故宅。其壙可以葬帝王。宅又可以居帝王。別宅又可以居牧伯。其壯麗可知。張讓說靈帝。令斂天下田畝稅十錢。修宮室。發太原河東狄道（隴西郡治）諸郡材木及文石。每州郡部送至京師。黃門常侍。輒令譴呵不中者。因強折賤買。十分顧一。（顧謂酬其價。）又不即收。材木遂至腐爛。州郡百姓嗟怨。（張讓傳。）此第宦官之自爲苛虐也。更有倚宦官之勢。而魚肉小民者。蓋其時入仕之途。惟徵辟察舉。宦官既據權要。則徵辟察舉者。無不望風迎附。非其子弟。即其親知。並有賂宦官以輾轉干請者。朱穆傳疏云。宦官子弟親戚。並荷榮任。兇狡無行之徒。媚以求官。恃勢怙寵之輩。漁食百姓。窮破天下。空竭小民。河南尹田歆。謂王詡曰。今當舉六孝廉。多貴戚書命。不得違。欲

自用一名士。乃以种嵩應詔。（見种嵩傳）六孝廉只用一真才。已爲美談。則入仕者皆閹黨可知。靈帝詔公卿刺舉二千石爲民害者。大尉許械。司空張濟。凡內官子弟賓客。雖貪污穢濁。不敢聞。而虛糾邊遠十郡清修有惠化者二十六人。吏人詣闕陳訴。（劉陶傳）則閹黨入仕者。莫敢黜革可知。是以天下仕宦。無一非宦官之兄弟姻戚。窮暴極毒。莫敢誰何。如單超弟安爲河東太守。弟子匡爲濟陰太守。徐愴弟盛爲河內太守。左愴弟敏爲陳留太守。具瑗兄恭爲沛相。皆所在蠹害。侯覽兄參爲益州刺史。吏民有豐富者。輒誣以大逆。皆誅滅之。而沒入其財。曹節弟破石爲越騎校尉。越騎營五百妻有美色。（五百者導引）破石從求之。五百不敢違。妻執意不肯行。遂自殺。（其淫暴無道多此類）此又宦官子弟賓客之肆爲民害也。由是流毒遍天下。黃巾張角等。遂因民之怨起兵矣。（單超傳）按陳寔傳。轉功曹。時中常侍侯覽。託太守高倫用吏。倫教署爲文學掾。寔知非其人。懷檄請見曰。此人不可用。而侯常侍不可違。乞從外署。倫從之。云云。以此推之。則宦官請託

之多可知。范書宦者傳序言東京宦官之害。詞意茂美。亦極賅括。曰（上略）中興之初。內官（今從劉氏攷說宦字當作內）悉用閹人。不復雜調它士。至永平中。始置員數。中常侍四人。小黃門十人。和帝即阼幼弱。而竇憲兄弟專總權威。內外臣寮。莫由親接。所與居者。惟宦官而已。故鄭衆得專謀禁中。遂享分土之封。超登宮卿之位。於是中官始盛焉。自明帝以後。迄乎延平。委用漸大。而其員稍增。中常侍至有十人。小黃門二十人。改以金璫右貂。兼領卿署之職。鄧后以女后臨政。而萬機殷遠。朝臣國議。無由參斷。帷幄稱制。下令不出房闥之間。不得不委用刑人。寄之國命。手握王爵。口含天憲。非復掖庭永巷之職。閹牖房闥之任也。其後孫程定立順之功。曹騰參建桓之策。續以五侯合謀。梁冀受鉞。迹因公正。恩固主心。故中外服從。上下屏氣。或稱伊霍之勳。無謝于往載。或謂良平之畫。復興于當今。雖時有忠公。而竟見排斥。舉動回山海。呼吸變霜露。阿旨曲求。則光寵三族。直情忤意。則參夷五宗。漢之綱紀大亂矣。若夫高冠長劍。紆朱懷金者。布滿宮闈。苴茅分

虎臣人者蓋以十數。府署第館。棊列于都鄙。子弟支附。過半于州國。南金和寶。冰紈霧縠之積。盈仞珍藏。嬌媛侍兒。歌童舞女之玩。充備綺室。狗馬飾雕文。土木被緹繡。皆割剝萌黎。競恣奢欲。構害明賢。專樹黨類。其有更相援引。希附權強者。皆腐身熏子。以自銜達。同弊相濟。故其徒有繁。敗國蠹政之事。不敢單書。所以海內嗟毒。志士窮棲。寇據緣間。搖亂區夏。雖忠良懷憤。時或奮發。而言出禍從。旋見孥戮。因復大考鉤黨。轉相誣染。凡稱善士。莫不離被災毒。竇武何進。位崇戚近。乘九服之囂怨。協羣英之勢力。而以疑留不斷。至于殄敗。斯亦運之極乎。自曹騰說梁冀。竟立昏弱。魏武因之。遂遷龜鼎。所謂君此始。必以此終。信乎其然矣。錢氏補表。宦者侯。鄴鄉侯鄭衆。以前誅竇憲功。以大長秋侯。永元十四年六月封。元初元年薨。龍亭侯蔡倫。以尙方令。久宿衛侯。元初元年封。永寧二年有罪。自殺。國除。雍鄉侯李閏。以小黃門侯。建光元年五月封。都鄉侯江京。以小黃門侯。建光元年五月封。延光四年十一月丁巳誅。宜城剛侯孫程。以中黃門（同王康等十八人）迎

立濟陰王爲帝功侯。初封浮陽。陽嘉元年薨。弟美嗣侯。浮陽侯壽。程養子。陽嘉元年。分程半封侯。華容侯王康。以中黃門侯。酈侯王國。以長樂大官令侯。湘南侯黃龍。以中黃門侯。西平昌侯彭愷。以中黃門侯。中盧侯孟叔。以中黃門侯。復陽侯李建。以中黃門侯。廣宗侯王成。以中黃門侯。祝阿侯張賢。以中黃門侯。臨沮侯史汎。以中黃門侯。廣平侯馬國。以中黃門侯。范侯王道。以中黃門侯。襄信侯李元。以中黃門侯。山都侯楊佗。以中黃門侯。下雋侯陳予。以中黃門侯。析侯趙封。以中黃門侯。枝江侯李剛。以中黃門侯。夷陵侯魏猛。以中黃門侯。東阿侯苗光。以中黃門侯。皆延光四年十一月辛巳封。高望亭侯興渠。以謁者長。與定策功侯。東鄉侯籍建。以小黃門侯。都鄉侯良某。以中常侍侯。陽嘉年封。列侯鞏順。以中常侍侯。漢安元年封。費亭侯曹騰。以中常侍定策侯。建和元年七月己巳封。侯嵩嗣。爲陶謙所殺。侯操。建安元年六月。以鎮東將軍領兗州牧襲封。九月。以大將軍進封武平侯。十八年五月。爲魏公。二十四年四月甲子。爲魏王。二十五年正月庚子薨。葉吉成。

侯州輔。以長樂太僕定策侯。建和元年七月己巳封。永壽二年薨。（水經注：湓水篇。又東逕驪縣故城北。水南有漢中常侍長樂太僕吉成侯州苞冢。冢前有碑。其碑云：六帝四后。是諂是諛。蓋仕自安帝。沒于桓后。夫封者表有德。碑者頌有功。苞墓萬古。祇彰諂辱。愚亦甚矣。）新豐侯單超。以中常侍。建策誅梁冀侯。延熹三年正月丙午薨。武原侯徐璜。以中常侍與誅梁冀侯。東武陽侯具瑗。以中常侍與誅梁冀侯。後貶都鄉上蔡侯左官。以小黃門史與誅梁冀侯。延熹八年有罪自殺。汝陽侯唐衡。以小黃門史與誅梁冀侯。延熹七年薨。皆以延熹二年八月壬午封。鄉侯劉普。以小黃門史與誅梁冀侯。列侯趙忠。以與誅梁冀功封都鄉。中平二年六月進封。六年九月誅高鄉侯侯覽。以上縑五千匹。助征伐。封關內侯。又託以與誅梁冀功。進封。熹平元。年有罪自殺。北鄉侯左黨。延熹二年封。八年二月有罪自殺。冠軍侯王甫。以長樂倉監。誣奏渤海王恢不道侯。光和二年。坐事下獄死。育陽侯曹節。以中常侍。定策封長安鄉侯。以誅竇武徙侯。建寧元年九月封。光和四年薨。

華容侯朱瑀。以長樂五官史。與誅竇武侯。初封都鄉。後進封都鄉侯。共普。張亮。皆以從官史。與誅竇武侯。列侯王尊。以中黃門。與誅竇武侯。列侯騰。是以長樂謁者。與誅竇武侯。列侯張讓。夏惲。郭勝。孫璋。畢嵐。栗嵩。段珪。高望。張恭。韓悝。宋典。皆以中平二年六月封。（按錢表書朱瑀以建寧元年六月癸巳封。此誤。是月係封定策之竇武等。至九月丁亥。竇武等乃爲曹節等所殺。瑀不得以六月封。）按宦官封侯。以後漢爲盛。元魏封公侯者亦多。唐代如仇士良之類。動封國公郡公。然不傳世。今附誌于此。

又按東京宦官之禍。極于鉤黨之誅。其時有志之士。皆欲誅之。皇甫嵩傳。嵩既破黃巾。朝政日亂。海內虛困。故信都令閻忠。說嵩曰。今主上勢弱于秦項。將軍權重于淮陰。指撝足以振風雲。叱咤可以興雷電。赫然奮發。因危抵頽。崇恩以綏先附。振武以臨後服。徵冀方之士。動七州之衆。羽檄先馳于前。大軍響震于後。蹈流漳河。引馬孟津。誅宦官之罪。除羣凶之積。雖僮兒可使奮拳。以致力。女子可使褰裳。

以用命。况厲熊羆之卒。因迅風之勢哉。功業已就。天下已順。然後請呼上帝。示以天命。混齊六合。南面稱制。移寶器於將興。推亡漢於已墜。實神機之至會。奮發之良時也。夫既朽不雕。衰世難佐。若欲輔難佐之朝。雕朽敗之木。是猶逆坂走丸。迎風縱棹。豈云易哉。且今宦豎羣居。同惡如市。上命不行。權歸近習。昏主之下。難以久居。如不早圖。後悔無及。張玄傳說張溫除中官。合是篇王芬欲乘帝北巡。以兵徼劫。誅常侍黃門。觀之。則其時宦官稔惡日甚。已有不容于國人之勢。故皇甫嵩諸人。雖不從忠芬之謀。而亦不舉發。蓋亦以宦官爲宜誅也。袁紹之屠宦官。固東漢之民意實然。唐崔胤之屠宦官。亦如之。史家不深咎宦官之惡。而轉以袁紹崔胤爲非。何顛倒若是。董卓者。曹氏之先導。晉將亡而桓玄篡。唐將亡而黃巢帝。漢之不能復興。誠有如閻忠所云。既朽不雕者。范書以陳蕃王允同傳。極有深意。謂陳蕃謀誅宦官。王允謀誅董卓。皆所以存漢。蕃謀洩而死。允謀成而亦死。而漢之亡決矣。獻帝偏迫權強。播越雍洛。與晋安唐昭同。而竟終天年。非天幸歟。仲長統

昌言理亂篇。繼體之時。民心定矣。普天之下。賴我而得生育。由我而得富貴。安居樂業。長養子孫。天下晏然。皆歸心于我矣。豪傑之心既絕。士民之志已定。貴有常家。尊在一。人。當此之時。雖下愚之才居之。猶能使恩同天地。感侔鬼神。暴風疾霆。不足以方其怒。陽春時雨。不足以喻其澤。周孔數千。無所復角其聖。賁育百萬。無所復奮其勇矣。彼後嗣之愚主。見天下莫敢與之違。自謂若天地之不可亡也。乃奔其私嗜。乘其邪欲。荒廢庶政。棄亡人物。澶漫彌流。無所底極。信任親愛者。盡佞諂容悅之人也。寵貴隆豐者。盡后妃姬妾之家也。使餓狼守庖厨。飢虎牧牢豚。遂至熬天下之脂膏。斲生人之骨髓。怨毒無聊。禍亂並起。中國擾攘。四夷侵叛。土崩瓦解。一朝而去。昔之爲我哺乳之子孫者。今盡是我飲血之寇讐也。至于運徙勢去。猶不覺悟者。豈非富貴生不仁。沈溺致愚疾耶。按此篇寫暴君亡國之狀。形容曲盡。統當靈獻之朝。蓋綜所聞見言之。劉蕡策曰。奈何以褻近五六人。總天下大政。外專陛下之命。威竊朝廷。勢傾海內。羣臣莫敢指其狀。天子不得制其心。曹節

侯覽復生于今日。春秋晉趙鞅以晉陽之兵叛入于晉。書其歸者。能逐君側之惡。以安其君。（此公羊之解。）今威柄凌夷。藩臣跋扈。有不達人臣大節而首亂者。將以安君爲名。不究春秋之微而稱兵者。以逐惡爲義。則典刑不由天子。征伐必自諸侯。云云。若明見朱溫以兵誅宦官之事。漢唐之亡。本出一轍。宦官惡盈。虿積。國人無不欲殺之。蓋至哺乳之赤子。皆變爲飲血之仇讐。自無不亡之理。今東西諸名國。皆無宦官。惟回教之國。間有之。然亦無善國。黃宗羲之言曰。欲己之多子。而先使人之無子。爲至不仁。是謂宦官本不宜有也。信哉。